

LAITAI

Vol. II. No. 6&7. June & July 2010



*Tanglai pate' upna nei le'ng,
Tual leh gal zong i it ding hi;
Nuntakna siangtho leh kam khum tawh,
Topa' hong itna thu gen ni;
Pate' upna, upna siangtho,
Ei zong sih dong i thuak ngam ding.*

Editor : Rev. Suan Khan Thang

LAITAI

(An organ of the Zomi Baptist Church)

Vol. II, No. 5. May 2010

Editor :

Rev. Suan Khan Thang
B.A., B.D., M.T.S
☎ 09615558559

Editorial Board :

Upa Zam Za Lang
Upa Zam Khan Kap
Upa J. Thawmte
Sia Nang SianMung
Pa Zam Lian Thang

Business Manager:

Sia N. Chin Thang
☎ 09615948861
Sia Tin Sawm Lian
☎ 08014225066

Circulation :

Pa Thang Khen Muang

Address :

Laitai,
ZBC Office
Champhai - 796 321
Mizoram, INDIA

Office : 03831-234700
Email : zomibaptist@yahoo.com
Website : zomibaptist.com

Zon-olna

Laimai

Editorial	01
Pate' Ni	02
Na pa' ginatlohna theisiam in <i>Evan. Lang Do Khup</i>	03
Na mavang ding hi <i>Rev. Pau Khan Khai</i>	04
Nuntak kilaih leh Khristian ... <i>Rev. Gin Lam Thang</i>	07
Kisin takpina <i>J. K Mungpi</i>	11
U.S. pan laikhak <i>Thangboih</i>	13
Minam bup in la kibang ... <i>Rev. Suan Khan Thang</i>	16
Minam bup lai tawh kisai	18
Piansak banga nuntakna <i>Pa Suan Khan Tuang</i>	20
Tulai Thupiangte	21
Dahpihna	

Laitai kum khat tatman :

India & Kawlgam Rs. 50/-
Gamdangte U.S. \$ 5/-

*Edited & published by Rev. Suan Khan Thang, on behalf of
Zomi Baptist Church, and printed at C.K. Printing Press,
Champhai, Mizoram - 796 321, and published at Bethel,
Champhai, Mizoram - 796 321, INDIA
Copies - 850*

DAHPIHNA



Nu Pau Khaw Don (22) Vapar khua Pa Dal Thang' zi April 28, 2010 ni in a gam paina ah tang khial kha in keenah kia a, a na thuak loin hong nusia hi. April 29, 2010 in Evan. Lian Go in vuina hun zang hi.

Pa Khup Khen Dal (41) Ngaizawl khua, Nu Cing Ngaih Vung' pasal singtung pan kiain May 3, 2010 in hong nusia a, May 4, 2010 in Rev. Cin Khan Tuang in vuina hun zang hi. Pa Dal in a zi leh a tate numei 2 leh pasal 2 paisan hi.

Nu Khoi Za Cing (77) Champhai khua Upa Lang Go (L) zi in gilsung natna hangin ni 4.5.2010 in hong nusia a, May 5, 2010 in Rev. Cin Khan Tuang in vuina hun zang hi.

Nu Ning Za Cing (74) Champhai khua, Pa En Dal (L) zi in May 13, 2010 in zunkhum natna hangin hong nusia a, Rev. Cin Khan Tuang in vuina hun zang hi.

Hih Khris sunga sanggam hong nusiate' innkuanpihte kithuakpih mahmah a, Topa in hong hehnepsak ding kideihsak hi.

- Editor

A sunga thuluite(articles) thu hong luikhiate'
sandan hi a, Editor saandan hi kim lo hi.

From :
LAITAI
ZBC Office,
Champhai - 796 321
Mizoram, India.

RNI No. MIZ.MUL/2009/29499
Postal Regd. No. MZR 82/2010 - 12

To

Editorial.....✍

Training Kum

ZBC in tu kum thulu dingin Kisinna (Training) kitel hi. Picin kum i zat khit ciangin Training kum i cih pen kilawm a sa zo lo om thei hi. Pawlpi leh kipawlna a picin semsem ciangin trainingna ki-uang bawl tektek hi. Mizoram ah Presbyterian leh Baptist Pawlpi pen Pawlpi lian leh akhangcing zaw Pawlpi ahih manin, Pawlpi thak neu nonote sangin trainingna thupi bawlzaw uh a, hunbit nasem dingin trainingna neisate bek zang uh a, hunbit nasemsate zong trainingsak kikkik uh hi.

I Pawlpi a khantoh ding i ut takpi leh, trainingna i hahkat kul hi. Pawlpi hunbit nasem dingte, amau sepa ding lam tekah trainingna a ngahsate hi leh hoih ding hi. Gentehna-in, Relief and Development lam a sai dingte Master in Social Work (M.S.W) sinsakin, Accountant dingte Computer/B.Com. sinsakin, Sunday School lam a sai dingte B.R.E. sinsakin, khangno makai dingte B. Th., B.A. banah Music sinsak laiin, Pastor dingte zong B. Th., B.D. banah Pastoral Ministry sin behlpsak lai lehang, i Pawlpi khangto zaw lai ding hi.

Pawlpi in kum thulu dingin kisinna i tel buangin khua, Khawk leh gambupah programme i bawl ciangin kisinna lam ngain programme i bawl siam ding thupi hi. A tuamin Special Programme i bawl zawh kei phial leh zong, khua sunga Committee tuamtuamte in hih anuaia thute tawh kisai genkhopna, holimna neikhawm thei zel lehang phatuam ding hi : Zolai gelh dan, Zopau maan zat dan, Nekzon dan, Tate kep dan, Pitek putek kep dan, Zindo dan, Nekkhawm sai dan, Sermon dan, Hun uk dan, Hon thunget makaih dan, Innkuan kikhop makaih dan, Tate laihilh dan, Cina veh dan, Sivui dan, Khuang tum dan, Sumpi aap dan, Solo, Duet leh Lapawl sak dan cih bang genkhawm zel lehang phatuam mahmah ding hi.

PATE NI

Gentelna :

Pawlpi tuamtuam ah Nute Ni i bawl bangin Pate Ni zong kibawl hi. Nute Ni in a hong piankhiatna a hang a om mah bangin Pate Ni in zong hang nei hi. Tua thu pen i theih kim nadingin hih anuaia bang hi :

America gam Washington Ukna sungah khua khat Spokane a kici om hi. Tua khua gei ah lui khat Big Bend River a kici luang a, tua lui gei mualbo tungah a lo uh khoi William Jackson Smartte innkuan a teeng uh hi. Amau nupa in tapa 5 leh tanu 1 nei uh hi. Atate uh neu lua lai ahih manin, a zan lam deuh a a si a nu uh pen khualak vak hong ciah kik dingin ngaihsun ahih manun, "I nu hong tung hak na e!" ciin a ngakngak uh hi.

1890 kum March kha sungin nitak khat William Jackson Smart zong a zi sihsanna hang a lungzuan khuangai pen a inn maiah tuin a kun ngeungau hi. Atate in lah a nu uh hong ciah kik ding sain a pa kiangah a om cilcil uh hi. Khua hong mial khit a sawt ciangin, a tanote khat khuamial lakpi ah a taikhia phengphang hi. A pa'n zong thakhatin delhin, a phak ciangin a aang ah tawiin inn a tun ciangin damin lupna tungah sial hi. Tua ahih manin, William Jackson Smart in a zi sih a

kipanin a tanote kepna ah nu' nasep leh pa' nasep thuah a tano 6 te a keem hi.

Tua bangin a tate keemin nu leh pa dinmun kopin sauveipi a om khit ciangin a tanu neihsun zong pasal neih hong hunin, John Bruce Dodd tawh hong kiteng uh hi. 1910 kum ciangin William Jackson Smart zong si leuleu in a zi han kiangah kivui hi.

Apa sih khit sawt loin, Nute Ni kikhopna khatah Mrs. Dodd zong va kikhawm hi. Thuhilh siapa in nute a thupina genin a pahtawina thu a zak ciangin a lungsim sungah nu leh pa-in a neihkhop a pa William Jackson Smart a phawk pha mahmah hi. "Bang hangin Nute Ni kinei napiin Pate Ni kinei lo ahi hiam?" cih a lungsim sungah nakpi takin ngaihsutna nei ahih manin, a neu tunga kipan nu leh pa a aneih, amah a kem a khoi a pa a phawkna-in June kha Nipi thumna pen Pate Ni ciin sehin pankhia hi. Amau gam bek hi loin, gam dangte in zong hoihsa uh ahih manin, tuin leitung gam tuamtuam mun tampi ah Pate Ni kizangta hi.

Pate Ni a pian nading lungsim asuaksak William Jackson Smart pen mi mawkmawm khat ahi hi. Ahih hangin biak kikhopna ah amanmana kikhawm

mi khat ahi hi. A nuntakna ah ama thubulphuh in, "Note tengah hong kibawl ding na deih bangun, midangte tengah na bawl un," (Mat. 7:12) cih ahi hi. Biakna lama nasem siate it mahmah hi. Ama ngimna bulpi khatah, 'midangte tengah sum leitawi lak loh ding' cih ahi hi. Atate a kilawm lopi a kizep ding a deih het lo mi khat hi a, a inn leh lo siangtho takin a om sitset dingin a deih mi khat ahi hi. Hih a pa pianzia leh makaihate phawk-in atanu Mrs.

Dodd in PATE NI a piangsak hi.

Pate Ni pen innkuan vaia eima inn ah bawl theih loh cih ahiah loh hang, Pawlpi biakinn a bawl ding ahi hi. Nipi zingsang i biak kikhopna hun dangte mah bangin bawlin pate pahtawina, thu leh lain hita leh, letsong leh adangdang a hoih thei penpen a Pasion biakpiakna tawh bawl ding ahi hi. Nute Ni a i zat bangin kum 70 a cingsa pate tengah lungdam koin, Pasion min phat ding ahi hi.



NA PA' GINATLOHNA THEISIAM IN

-Evan. Langh Do Khup

Na pa in Noah bangin zu kham thei kha mah ding hi. Tua bek tham loin zawllengin zawlta nangawn nei kha thei ding hi. Bangbang hi ta se leh, na pianna, na pa simmawh tuan kei in. Midangte in hong simmawhsak zongin nang simmawh tuan kei in.

Na zi hong deihsak lohna hangin nang nangawn hong telkhial kha thei ding hi. Tua bek tham loin, nangma mawhna ahi hetlo thu khat peuhpeuh hangin zong hong telkhial thei ding hi. Bangbang ahi zongin, na pa telsiam tawntung lel in. "Kei dikzaw ing, Kei' mawhna om kei" ciin a khasiat nadingin bawl kha kei in.

Mawh ta leh, dik ta leh, na

pa lamah Pasion pang ahiah manin na zo thei kei ding hi. Leitung thu leh thatang hatna thu ah na zo kha zong, na pa' gau, na pa' vang lelin, kamsiatna, hamsiatna na tengah hong tug ding hi.

Nang mawhna lopi hong mawhsak khak leh zong, thuakzo lel lecin Pasion in a maan takin thu hong khen lel ding hi. Mi pawlkhate in, a pa uh a ginat loh ciangin simmawhbawl kha thei uh hi. Tua bek tham loin, Noah tapa Ham bangin a pa uh ginat lohna teng midangte tengah gen-gen lai uh hi. Tua bang mite pen, apa zahmawh a seelsak lo, Ham tawh kibang uh hi. Ham mah bangin samsiatna ngah ding uh hi.

NA MAVANG DING HI

- Rev. Pau Khan Khai
Crusader, ZBCM

Thumasa :

Hi thului gelh theih nadingin hun pha hong pia Pasion tungah lungdamna ka ko masa a, gelh theih nadingin hong geelsak Aizawl khua a om Pa Tuang tungah zong ka lungdam hi.

I omna mun a kibatloh hangin hong nei Pasion kibang hi. Hih thulu pen tutung Malaysia Crusade thulu hi in, ka lungsim hong lawng kha mahmah ahi hi.

1. Mavan nadingin biakpiakna thupi sim ding :

Lai Siangtho sung i et ciangin biakpiakna a thupi ngaihsutte tungah mavanna kipia a, biakpiakna a thupi simlote tungah mavanna om thei lo hi. Mavang cih ciangin i mailam ading thugenna ahih manin mailam khuahun khempeuh a nei Pasion maipha i ngah ciang bekin i ma hong vang thei ding hi. Sum zong leh kumpi nasem te'n a nasep a thupitsak ciangin thupha a ngah theih bek bangin, Pasion i phat a, hoih taka i biak ciang bekin i biakpa tung panin thupha ngah thei pan ding hi hang.

(1) Abraham nuntakna : Biakpiakna thupi ngaihsut mahmah mi ahi hi. A lampai zia ding Pasion tungah dongin,

Shekhem ah biakna tau lamin, Topa tungah biakpiakna piak ciangin Pasion in a kalsuanzia ding leh a kalsuan nading hoih takin lamlak hi. Biakpiakna a thupitsakna tungtawnin Pasion in thupha a piak nop luat manin, “Tapa tawh biakpiakna hong pia in”, ciin kal a, ahi zongin Abraham in lungsim siangtho takin Pasion thu mangin a kiphal ciangin, Pasion in ama tung panin Jehovah Jireh cih kammal hong kipan khiasak hi. Biakpiakna a thupisak Abraham pen Pasion’ Lawmpa cihna zong ngah beh lai hi.

(2) David nuntakna : David pen biakpiakna tawh gualzawhna a ngah den pa ahi hi. Mite muhna ah zawh theih ngei loh ding tampite Topa tha tawh zo denden hi. Mite muhna ah kilawm lo

phialin Topa a itna hangin om ngei ta leh, Pasion a lungsim khempeuh tawh itlua ahih manin, Pasion in, “Ka lungtang hong tuakpa” cihna thupha min pia hi. Leitung ah mipil tampi om ding hi taleh, Bethlehem khua a Jesu a bia mipil thum teng mah kilimgen pen hi. Marite unau in Jesu tungah biakpiakna limci lui uh ahih manin Jesu in, “Leitung khempeuhah lungdamna thu a kigena khempeuhah hih nu’ nasepna kigenen ding hi” ci hi.

Dotna : Khatveivei Pasion biak ding leh phat ding pen kulsakloh hun om thei a, ahi zongin, i nuntakna i lungngaih ciangin **kop nuntakna** bek ahi hi. I hute Pasion hong kop, i khut i khete Pasion hong kop hi, ei a bangmah om loin, avekin Pasion hong kop bekbek ahih manin, ama thuphate mah tawh ama min a phat lel i hi.

2. Mavan nadingin Pasion awnem (kammal) za den ding : Mi khempeuh zaknop mahmah khat pen Aw nem ahi hi. Pasion in Leitung na khempeuh a kammal or a aw nem tawh piangsak hi. I nuntakna ah i kisap khempeuh Pasion kammal tawh piangthei hi. Inn lian pipi a kat ciangin a sunga a kammal kigelhna Lai Siangtho

a hu zo Pasion in ama kammal a kemte pen hong hu zo lua ding hi.

(1) *Guhkeute a hingkiksak thei kammal hi* : Guhkeu tampi omna ah Pasion in Ezekiel sawlin, ama kammal pulaksak a, Pasion’ kammal a za masa guhkeute hong hingkik mawk hi. Akeusa i nuntakna hong hing kiksak dingin Pasion awnem or kammal kismah hi.

(2) *Jakob thupha angahsak Kammal hi* : Esau leh Jakobte unau kituhtuh thu pen a pa’ kammal kuan za masa ding cih ahi hi. Apa kammal aw nem sungah thupha a dimin om ahih manin, Jakob in tua thusim thei a, apa kammal za masa dingin hong kithawi a, za masa takpi ahih manin, tuni dongin amavang hi. Pate’ aw nem aza siamte mavanna in hong tuam ding hi.

(3) *Jeriko kulhpi a cipna kammal hi* : Pasion in Joshua kiangah, “Jeriko khuapi leh a mi thahatte nang tungah kong pia khin hi” cih kammal zasak masa hi. joshua in Pasion’ aw nem upna tak tawh sem pah ahih manin a zak kammal bangin a gah mu hi. Pasion aw nem a zadente adingin Pasion in i mai a i kiktak mahmah kulhpite a cimsak zo lua ahihna i

mu hi.

(4) *Peter a lawhcing kiksak kammal hi* : Peter in ngasa bengin a lawhsap mahmah laitakin Jesu tawh kimu kha a, ahi bangbangin a om laitakin Jesu in a kammal zasak a, Peter in Jesu kammal a zuihzawh caingin a beisa a alawhsapna a gim mahmahna mun panin a lamdang lawhcinna leh lamet ngam loh thupha tampi ngah hi. Ei tha bek tawh i sep leh kilawhsam ding a, Topa kammal tawh i sep leh kilawhcing ding hi.

3. Mavan nadingin na hoih sem ding : Na hoih sepna in hong mavangsak ding hi;

(1) *Jonathan nuntakna* : Jonathan adam lain Pasian a it David tungah na hoih a sep manin ama tapa khelbai Mefiboseth tungah a pa hangin Pasian in David tungtawnin mavanna pia a, a khan tawngtungin kumpi sabuaiha kumpi' an nekha zen hi. Pasian a it leh Pasian nasemte tungah na hoih a sem nuamte a tapa in mavanna ngah hi.

(2) *Esher nuntakna* : Judah minam buppi a si ding ahih laitakin Esther naupangno in nakpi takin ni thum sung antangin thu a nget leh Pasian in na hoih sep ding khat

lak a, tua pen kumpipa maiah ankuang lui ding ahi hi. Esther in sem pah lian ahih manin, kumpipa maipha ngah a, Judah minam buppi ma hangin hong suakta hi.

(3) *Jerapheth khuami meigong nu* : An nek khat a nei lai meigong nu hiih, puksih tawh a kizom ding a nuntakna pen Topa mi pa Elijah tungah na hoih sepna in nei-in, ama nek main Pasian mipa masak in nesak masa ahih manin, Pasian in puksih dinmun tawh kipelhsak hi. Ataktakin ci lehang, Pasian in meigong nu tawn loin a nasempa anvak thei lua a, ahi zongin, meigongnu annek theih nadingin a tawsak ahi hi. Meigong nu mavan adingin Pasian in an a vaksak hong suakta hi.

***Thukhupna* :**

Maangmuhna 3:8 ah, “Note nasep hoih tawmcikte hangin kuama khak zawhloh ding kong, note maiah honsa in kikoih hi” ci hi. I nu i pate na hoih sepna hangin eite tungah thupha hong tung ding hi. Nu hoih, pa hoih i cih pen na hoih tampia semkhiate hong suakta hi. Ka neu lain ka nuin Pasian nasemte om loin an lim nek ding ngaihsum ngam lo liang hi. Khuanawl ah gospel hong paite vaidawn pen ama nasep danin

ngaihsun a, a sep theih sunsun tawh Topa maipha a zon den pen ka lungdamna mahmah khat hong suak hi.

Zomite pen midangte na hoih sep tawh a pokhia i hi a, tuin ei leh ei mahmah na hoih sepna sungah a nuamsa dingin Pasion

in hong deih ta hi. Pasion minthan nading leh i mite kilapsang nadingin thungen in hamciam ciat ni.

Hih lai asim khempeuh tungah Pasion in mavanna thupha hong pia ciat ta hen. AMEN



NUNTAK KILAIH LEH KHRISTIAN BIAKNA

(Social Change vs. Christianity)

- Rev. Gin Lam Thang, Shillong

“ Topa na Pasion un note piak dingin na pate uh Abraham, Isaak leh Jakob tungah a ciam., note’ phuh loh a lian a hoih khuapite... leh Oliv kungte a omna leitangah hong paipih in, note in ne in na kham uh ciangin, sal suahna Izipt leitang panin hong paikhiatpih Topa na mangngilh lohna dingun kidawm un ” (Thkna. 6:10-12)

Friends Missionary Prayer Band, North Eastern Zone makaihna tawh, 6-8 November 2009 sungin Riboi Presbyterian Synod nuaia om Umdihar khua ah National Missions Conference tung hi. Hih Conference ah Shillong ZBC Upa Vum Khan Do tawh ka pai thei uh a, CBA lam panin Rev. Lang Khaw Gin zong hong kihel thei hi. Hih Conference tawh kisai report piak ding hun hi nawn lian lo ahih manin, hih hun sunga Seminar Paper khat “So-

cial Change vs Christianity” cih thu, Thuhilhikikna phung 6 sung siksana kibawl pen tulai hun tawh kituak ahih manin ahi thei bangin gelh kong kipan hi.

1. THU KONG HONNA: Hih i tenna leitung pen a hunhuna kikhel(change)thei zel khat hi a, khaw hun, huih leh datte a kipan singkung lopa leh ganhing namkimte dongin nuntak zia leh om zia a kikhelna leitung ahi hi. Mihingte nuntak zia zong a

hunhunin kikhel toto a, tuaci banga a kikhel theihna pen gamsung ki-ukna (politics), nek zonna (economics), biakna (religion) leh a tuamtuan hang hi. Hihte in tangpi tangta nuntak zia kilaihna (social change) tungsak den hi. A beisa kum 20 hunlai leh tu hun ekkak leng nasia takin i nuntak zia kilaih ta hi.

- 1) Mawtaw tawmcik pan mawtaw tampi ah kilaih to.
- 2) Bi inn sung pan taihinn sungah kiteng.
- 3) Laikhak pan Email, Fax, SMS
- 4) TV channel khat pan channel tampi ah
- 5) Khanghamte ukna nuai pan khangthakte ukna nuaiah etc. cih bangin i nuntak zia tampi tak kilaih ta hi.

2. AMANPHATNA: Mihing nuntak zia hong kilaih ciangin a manpha tampi hong piang khia hi. Tu hun ciang khualzinna dingin mawtaw, meileng leh vanlengte kizang ta ahiah manin, sum leh pai zongte leh khualzin mite adingin baih ta. Nek leh dawn zon zia ah zong lokhawh bek tawh kinungta nawn loin, sep ding tuamtuan hong om ta hi.

3. NGIMNA HOIH NEIH KISAM: Nuntak zia a kilaih

ciangin ngimna hoih tak i neih kisam hi. Mai lam kalsuan zia ding hoih taka geel kholin, i nek zonna ding leh i sep zia ding kician taka i theih kisam hi. Ngimna kician i cih ciangin kisinna(training) hoih tak neih kisam cihna hi. Computer tawh nek zon hun hi ta ahiah manin Computer i kisin ding hi a, Mikang pau tawh nek kizong ahiah manin Mikang pau i sin kisam pah hi. Tuaci bangin a hun zuia i kisin toh phamawh hi. Hih nuntak zia kilaih tawh kituaka i kibawlphat siam kei leh, i maban ngaihsuthuai peuh mah ding hi. Hih leitunga om ngei ganhing Mammoth leh Dinosaur te khaw hun kilaih tawh kituakin a nuntak zia uh kibawlpha siam lo uh ahiah manin tu hun ciangin muh ding om nawn lo hi.

4. THUPIAK: Nuntak zia a kilaih ziahziahna hunah kip taka i om theihna ding leh i khan a sau theihna dingin Pasion in Israelte kianga thu a piak tungtawnin kikum ding hi hang. Israelte nuntak zia hong kilaih a, saltanna mun Izipt pan suahtakna leh hauhna mun Kanan ah om ding hi ta uh hi. Kanan gamah a lam loh uh innte sungah om ding uh a, a suan loh uh leenggah leh oliv te ne ding uh hi. Tuaci banga a om uh ciang a nuntak zia ding uh lamlahna thupiak Pasion in pia hi.

(1) *Innkuan biakpiakna*: Innkuan sungah biakpiakna limci tak nei ding uh hi(6:4-9). Pa penin a zi leh tate Pasion thu tawh makaih ding a, nuntak hoih leh gamtat zia ding hilh ding hi. Tu hun ciang pulpit tung pana thu hoih i gen bangin innkuan sungah thu hoih kigen lo hi. Tate mai lam hun ding geelsakna leh makaihna kician om lo ahih manin innkuan kisia hi. Tua in gam leh minam dongin siatna piangsak hi.

(2) *Thupiak palsat lo ding* : Israelte hau in nuamsa in a om uh ciangin Pasion mangngilh loh ding uh ahi hi. Pasion hehpihna hangin nuamsain om uh a, a thukhamte palsat loin, milim pasiante mai ah kun loin amau a honkhiapa Pasion bek mah a biak ding uh ahi hi. (Tu hun Zomite i hauh ciang bangci nuntak i hia?).

(3) *Gentheih lai phawk ding*: Kannan gamah hau in nuam a sak uh ciang a beisa huna saltang ahih lam uh a mangngilh ding Pasion in phal lo hi. Tua in mi haksate dinmun theisiam dingin deih cihna ahi hi. Mi pawlkhatte a hauh uh ciang a beisa huna amau a huhte leh a pattahte phawk nuam nawn loin, kisa thei takin om uh a, a tawpna ciang kisia uh hi.

(4) *Hilkhholhna*: Israelte Kanan gamah a om uh ciang hau in nuamsa ding uh a, a neih ngei loh uh nate nei ding uh hi. Pasion in tua hauhnate zat zia ding a hilh banah, a phawk den ding uh thu pawlkhat zong hilh khol hi. A hilh banga a om kei uh leh amaute tungah siatna tung ding ci hi.

5. TU HUNA I NUNTAK ZIA: Tu hun Khristiante nuntak zia i et ciang limci het lo hi.

(1) Innkuan biakpiakna a nei lo Khristian innkuan tampi tak ki-om ta. Tua bek hi loin innkuan sung nuntak zia ding a ngaihsun lo leh a awlmawh lo, innkuanpihte gan khawi banga a khawi tampi tak om ta hi.

(2) North East India ah Khristian innkuan kitam kham (broken family) tampi tak om ta a, survey a kineihna panin South India lam sangin innkuan kisia tam zaw hi.

(3) Tate kiangah sum leh pai zat zia ding leh kep zia ding a hilh ngei lo bek hi loin, gamtat zia ding zong a hilh ngei peuhmah lo tampi ki-om ta hi.

(4) Mi haksa leh mi gentheite khaulna khat zong a neilo tampi tak om ta hi.

(5) Hauhna pen i hoih zatloh

manin a hoihlo tawh kibang hi.

(6) Gamtat siate a siahuai zaw semin om uh a, siat lam manawh tektek uh hi.

(7) Huaihamna leh muanhuai-lohna in mi zawng leh mihaute tungah vaihawm hi.

6. BANGCI MAPANG

DING: Hih a tunga thute i et ciang i nuntak kisia in bawlphat-huai mahmah hi. A bawlpha dingin koi pan kipan pha ding i hiam ? Hih bangin kipan thei leng gah limci lamethuai pen hi.

(1) *Lai Siangtho ah ciahkik ni:* Innkuan biakpiakna tawh bul pat ding hi. Innkuan biakpiakna panin nuntak zia ding kihilh thei hi. Bob Pears in mi gentheite leh tagahte itna lianpi neiin amaute adingin lim takin sem a, leitungah minthang mahmah hi. Ahi zong a innkuanpihte awlmawh loin, amau ading ngaihsutna nei lo ahih manin a zi leh tate kha sia uh hi. A tanu in, “Ka pa in ko sangin mizawng itzaw” ci a, kiguiawk hi kici hi. Bob Pears mahmah in zong khial kisa a, “Pasian in mi zawngte it thei dingin talent hong pia ahih manin amau ka buaipih hi. Ka innkuanpihte pen Pasian in a buaipih dingin ka ngaihsun a, ahi zong kei buaipih ding mahin

na koih hi” ci hi.

(2) *Neihsa kepcin dan hilh ding :* Tate in nu leh pate manphatna a theihna dingun thu hilh ding kiasm hi. Tua banah neih leh lam zat zia leh kep zia zong i hilh kiasm hi. Tu hun khangthakte in nu leh pate pen amau deih bangbang a pia dingin ngaihsun uh a, sep khiat sawm loin nget bek tawh nungta uh hi. Tua in innkuan kisiatna bul ahi hi.

(3) *Pawlpi in zong tavuan nei:* Tu hun nuntak kisia hi cih Pawlpi in zong a theih ding leh a puah dan ding a ngaihsut kiasm hi. Pawlpi makaite leh pawlpi mite a tam thei pen thusinna (training) neihpih kiasm hi. Innkuan a kisiat ciangin khua, gam leh minam kisia ahih manin, mihing nuntakna puah ding leh lam maan lah ding pen Pawlpi tavuan poimawh khat ahi hi.

THUKHUPNA : Thuhilhikikna phung 6 sung a thak a i sim kik ding hoih hi. Tua ah i hauh hun cianga om dan ding bek hi loin, i hauh theih dan ding leh i khansau theih dan ding thu hoih tapi kigelh hi. Pasian theihpih loh hauhna om kha thei ding hi. Ahi zongin tua hauhna in innkuan kisiatna, hin gimna leh dahna piangsak thei hi.

KISIN TAKPINA

- J. K. Mungpi, Malaysia

Tedim pau bel tangzai mahmah mawk in; “*Kisin*” i cih caingin Mangpau tawh *training* a kicih laitak *testing* zong hi thei leuleu hi. Gentehna in : A sermon ngei nai vet lo mi khat pen sermon dingin kiese ahah manin a gen ding thu litak ngaihsunin hong *kisin* ciauciau a, ahun hong tun takciang Pulpit kahtoin a khatveina dingin sermon hong *kisin* petmah hi. A masazaw kisin pen training hi in, a nunung zaw pen testing hi. A kitel nai kei leh; Thangno in mawtaw hawl kisin (*train*), A kisin (*test*) nai lo Lano tungah Jesu tuang.

Bangbangin i khia zong tu kum ZBC thubulphuh KISINNA cih tawh kisai-in *training* ding maw, *testing* ding cih tawh buai loin, Mikang pau word khat in a gentel zawhloh KISINNA cih tawh i ki-*train* dinga, i ki-*test* ding hi.

A masazaw (*training*) pansanin kisin takpina gen masa leng : Na khat peuhpeuh kisin dingin utna, ahah kei leh kitangsapna khat zawzaw a om masak kizam hi. Gentehna in, B. Th., degree ngah tektek pen a theology sinzia uh kibang khollo thei hi. Pawlkhat

pen kuama cialna om lo, amau utna leh thangahna ngiat tawh Pasion nasep ding a lunggulh manun theology sin a om laitakun, pawlkhat leuleu pen Pastor ding kikap vanvanna tawh laisiam khat theology sing dingin va kunkhia, ama ut thu hi lo, mipi leh Pasion zahtakna hang tawh B. Th. hong kisinkhia uh hi. A nih tuakun Pasion in a zat nakleh Pawlpi in phattuampih hi lel a, a theology sinzia uh a kibat loh hangin, Pastor nasep sem thei dinga ciangtan B. Th. degree ngah tuak uh ahah manin Pastor hi thei tuak uh cihna hi. I gennop zawk pen kisin dingin utna, ahah kei leh tangsapna a om masak kizam hi cih thu ahah hi.

Utna tawh kisinna gen leuleu leng, na khat peuhpeuh pen utna leh thangahna taktak tawh sin leng lawhsam cih om lo hi. Scientist minthang Thomas A. Edison in elcetric bulb a muhkhiat nadingin tulkhath vaal vingveng tak a lawhsap nungin lungkia tuan lo a, a utna lian mahmah ahah manin, a sin tohtoh takciangin, na inn sungah a tang pempam electric bulb a neihlawh na hi hi.

David kumpi tokhomah a tutna zia

ngaihsun leng, a tuu cincin lai pana a na kisinsin, suang lot pan hong kipankhia ahi hi. Hauhna, pilna leh siamna tuamtuam khong 'deihhuai' cihna ciang bek hi loin, 'Ut lua ing' cihna tawh kingah thei bek ding hih tuak hi.

Zomite bel hih theih, hih nop hau zelzul napi, siam taktak a nei khol lo vive kivi pian hi. Lapawlah kihel thei, volleyball beng thei lel, Football ci leng a ngaihsuthuai lote, EPL thugen leng Rooney, Terryte kalkhat lawh dongin a gen thei lianliante i hi hi. *Jack of all trades, master of none* (hih thei zelzul napi'n siam taktak nei lo) pen Mikang te'n Zomite hong genna hi phial leh kilawm! Ut takpina tawh na khat peuhpeuh kisin leng i neekmuhna kician hong suak thei ding a, ut veve lel na bek tawh kisin leng sum beina hong suak ding hi.

Tangsapna tawh kisinna genkik leng, mikim in taangsap i nei ciat a, i tangsapna in i dinmun hong niamsakin, Pasion tawh hong kigamlasak thei hi. Upa te'n "Meel kibawlpaha thei kei a, gamtatzia (character) ahieh leh kibawlpaha thei" na ci uh hi. Tu hun ciang bel, a maammaan lai tam thei khang maw? Khatvei News ka sim leh Chinese nungak

khat in Jessica Alba sun dingin plastic surgery tawh a mel bawlpahat sawm cih thu kigelh hi. "Bang hang hiam cih leh, ka lawmpa'n Jessica Alba haipihin, amah bang theithei dingin kizepna leh hair style hong bawlsak tawntunga, a mobile phone ah ama man bekbek koihi hi", ci hi. A lawmpa pen ngai mahmah ahieh manin a taankhak ding lau a, a lungkim ding lametna tawh Pasion piak a mel pen Jessica Alba asuun dingin bawlpahat a sawm hi tazen hi. A gamtatzia a bawlpahat bek tam thei khang!

Pasalpaha Vanapa pen atungin a sintom mana minthang khat hi. A sawt teh, a sintomna pan lungduaina hong kisin taktak a, kuamah in hehsak zo nawn lo leuleu hi, kivi hi. Tu dongin Vanapa a min taktak (Thang Za Sing?) pen Pasalpaha, mi lungduai mahmah khatin kiciamteh den ta hi. I gamtatzia hoihlo tuamtuamte pen kisinna tawh kibawlpahat theih luat hi cih hong phawksak hi.

Tangsapna tawh kisai kisinna thu gentehna khat gen leuleu leng. Damlo natna kibang, nat hun kibang lian nih om uh a, a khatzaw in a natna a phawk phetin Zato zuan pah a, Siavuan kivalsakin zatui maanmaanin ne a, hong

dam pah hi. A khatzaw leuleu in bel, a natna phawk gegu napin “Bangmah tham hi kei, hi bang peuh Zato zuat taak kei”, ciin a natna kitheihmawh bawlbawl leh, ni khat pen a nasepna ah a luvai-in hong pukvat a, a nakpan si luangin Zato kitun hi. A nihun Zato tung tuaktuak mah leh, a masazaw pa’n a hun lapin tung ahih manin damna ngah a, a nunungzaw pa ahih leh, Zato a tun ciangin zekai pha mahmah ta

hi. Hihte gel mah bangin, muh theihloh natna i pai giugiaute lakpan kisinna tawk damna ngah thei ding hi hang. A kisin masate a hampaha, a kisin nunungte a hamsia hi ziau ding hih tuak hi. Mihing i hih manin paubanna a nei lo i om kei hi, ahi zongin i tangsap phat diak, i gamtatzia hoih lo tuamtumte lak pan i kibawlphat theih ding deihna tawh ZBC in tu kum thubulphuh dingin KISINNA hong pulakkhia hi ciin ngaihsun ni.



U.S. PAN LAIKHAK

To

ZBC Pawlpi mite leh ka mipihthe aw,

Amasain hih ciang hong tun pih i biak Pasion tungah lungdam thu ka ko hi. Ko innkuan pen India khuapi Delhi panin date 17.11. 2009 in pawlpi mite thungetsakna leh Zomi a kuama ciat nong thungetsakna uh hangin America ka tung uh hi. America ka tun uh ciangin minam itna leh Zomi ka hihna tel pha semsem ing. Ko innkuan pen Mangpau ka siam man vua U.S.A a tung hi loin, ei Zopau Tedim pau ka siam man vua atung ka hi uh hi. Zum khat peuhpeuh i pai ciangin, pau i siam loh hang pau siam na tam mahmah hi. Ei kam hong phensak te’n sum tam pipi sang uh a tua zong mite ading thupha i suahna khat ahi hi.

America pen zum khat peuhpeuh i pai ding ciangin ei man hunhun a pai theih hi loin, hilh masak kul hi. US ka tun cil un khatvei zum ka pai uh leh, pau deih banga siam lo ka hih manun siavuan nuin, “Chin na hi uh hiam?” hong ci-in, “Hi mah ung ei,” ka cih leh phone hong mekin

kamphen (interpretation) hong samin ka kiho uh leh, sanggam Falamte na hi-in, Pasion huhna tawh Falam pau ei Zopau mah banga ka na siam manin haksatna om lo hi. Tua a kipanin kei pen Chin sung a kihel minam khat hi-in, **ka hihna taktak pen Zomi hi'ng** cih ka kitel mahmah hi.

ZOMI LEH ZOPAU :

Zomite in gam leh lei nei lo i hih manin mi' gam tengah teng kawikawi, mun khempuehah kithehthang hi hang. Mizogam a om Zomite pen i omna gam pau siam pen hoih mahmah hi. Pawlkhatte bang siam lua ahiah manun Mizo kisa kha thei phial hi. Ei'pau siam napiin ei kam tawh thungen thei lo, i la hoih mahmahte sa thei lo mi tampi om ta hi hang. Na ka sak mahmah pen bang zah takin Mizo pau siam ta lehang "*I va thiam ve Mizo i ang a lawm,*" hong cih mah na sa pen ing. **Ang** cih kammal pen **hi het lo hi teh** cihna hi. Thuhoih lamah, "Unau vek kan ni" hong ci napi, thu sia a om ciangin bang hong ci hiam? "Paihte ho an nih loh chuan Pawiho an ni ang" cih pen i lawhtak ahi hi. Tua ahiah manin, i minam ngeinate, i pau i hamte thupisak ni. En zun kei leng kuan hong zunsak ding hiam?

UNAU VEK KAN NI :

Bang hang unau hi hang cihcih kul hiam? Na pianpih na sanggampa na sanggamnu kiang ah unau hi hang cici le cin, mi'n mihaipa hong ci ding hi. Unau taktakte kiangah unau hi hang cih thu gen kul lo hi. Khatvei ka lawmpa in Mizo leh Zomi i cih pen kilamdang het lo hi, i laipil masa ten ah ZO leh MI cih pen amasa a nunung ut dandan vua a na koih man hi lel hi hong ci in, ken lawm aw, leimawng khat leh mawng khat a na om pen kimaingat in akinehneh uh leh hun khat ciang kituah thei a, kilehbulh(lehngat)cih pen kituak, kilem cih bang om thei lo hi, ka cih leh hong dawng thei loin, 'a dik khawp mai' hong ci hi. Tua ahiah manin panlain thasanin, i minam leh i pau thupisak ciat ni. Ka omna lam thu pawlkhat hong gen uam ing.

AMERICA THU :

India gam khuapi Delhi ah ka om lai-in mi tam mahmah ahiah manin USA tung leng mi tamtak inteh ka cih leh, na hi het loin mi bel tam mahin kuamah mel muh ding om lo hi. Khuapi sung pai leng mihing

muh ding om lo semsem hi. Khuaneu lamzaw deuhah sai (store)tam zawsawpin, mi tawmtawm muh ding om hi. Mite na khangto mahmah uh a, nasep hunah semin, mawtaw tawh pai-in, khe tawh avak mahmah muh ding om lo hi. Ei lam bang loin mawtaw kongkhak bit tak a khak uh ahih manun mawtaw bekbek kimuin, mihing kimu lo hi. Mawtaw tam lua ahih manin ka lawmpa bang in, “Lawm USA ah mawtaw leh mihing bang a tam zaw tam?” hong ci liang hi. Ken, “Lawm mawtaw ahawl om loin atai na mu ngei na,” ka cih leh “Hi sam mah maw” hong ci hi.

Agam siangtho mahmah ahih manin, ka tun uh a kipan tu dong nin paihna nangawn ah tho khat beek zong mu nai lo hing. Ahuih siangthoin cidamhuai mahmah ahih man tangval khatin, “USA ah a cidam lote bel leitung koimun mahah cidam ken teh,” ci hi. Tua pen man sa mahmah ing. Nek le dawn siangtho mahmah ahih manin kicidamin kithau baih mahmah hi. USA gam pen zang gam hi a, a gam omdan, asing podan, mual neu cikcik omdante ka etet ciangin, “Aw Pasion hoih lua mah si e, bang ding ko Zogam zong hih bang a hong bawlsak lo na hiam?”, ka cih hun bang om phial hi.

KIZEPNA :

America mite pen kizep siam thei mahmah hi. Etlawm mahmah uh hi. Khat veivei ciang, “Aw Pasion bang hang ka tangval lai-in hong puak mengmeng lo na hi hiam?” ka cih hun bang om dekdek hi. Nungakte pen nawi dawk hi den mai, i et man nak leh a nawi uh dawk hi den hi, a mau pen nawi khawng phamawh sa se loin, a nawi muk bek uh hoih takin tuam hi. Ami limlim thusiam (polite) thei mahmah uh a, i kituakna munmunah “Zing pha,” ahih kei leh, “Ni takpha, na dam hiam?” hong ci teitei uh hi. Sai ngak (storekeeper) nungakte bang pen, ‘hih nu in hong ngai hi inteh,’ cih theih zah dingin mi hopih siam uh hi. Hong ngai i sak leh na hi loin, a mau dan khat na hi lel hi.

I gam zong Pasion in thupha hong pia ding a, hun khat ciang tua mah bangin nuam mahmah ding hi, tua dingin thungetna ah phawk ciat ni.

Thangboih, Georgia, USA
email : thanglamtin@gmail.com

MINAM BUP IN LA KIBANG NEIKHAWM LE'NG

- Rev. Suan Khan Thang
Executive Secretary, ZBC

April 9, 2010 ni-a Tedim khua a Zomi Christian Literature Society (ZCLS) sunga *Board of Management* meetingna-ah a thu ngaihsut khat “**Minam bup in la kibang neikhop ding**” cih thu in ka lungsim hong lawng kha mahmah a, tua bang lungsim lian leh tupna thupi i neih pen minam khangtote zia ahi hi.

I minam bup in biakna Labu sunga English la a kiletkhiate, a thu kibang i neih nadingin a kul leh, i sepsate sup ngam, mindai a kul leh zong thuak ngam kismah hi. Tu hun laitaka biakna makaite in khaici hoih lo (tangpekna khaici) i tuh khak leh, i tu leh tate mailamah kikhento suak ding uh a, khaici hoih (kipawlkhopna khaici) i tuh leh, minam neu dangte nangawnin Tedim pau a zang Zomite hong pawm ding uh hi. La pen, a thu hoih leh a maan i deih luatna hangin Pawlpi tuamtuamte

i tangpek tek sangin, a la thu in Pasian min daisak liang ahih kei nak leh, Pawlpi tuamtuamte kipawlkhawmin ma i bunkhop ding tu laitakin kul masa pen hi. A la thu khawng pen mailamah Pawlpi tuamtuam panin makaite kikumin, a kicing zawin hong puahpha toto ding uh hi. Tua banga puah hun a om zenzen leh Rev. S.T. Hau Go' la lehkhiate zong (a thuneite in a phal uh leh) ethuai ka sak pawl a om hi. A gualtawp a thu kihual (rhythm) hoih a, i Zopau maan zang hi.

PAWLPI TUAMTUAMIN LA KIBANG NEILEHANG :

1. Nopni dahni a i ki-uapkhop ni ciangin i la theih kibang tek ahih manin, lasak nuam mahmah ding hi.
2. Pawlpi khempeuh zat theih dingin Labu hong kicing ta ding

PAWLPI TUAMTUAMIN LA A TUAM TEK NEI HI LEHANG :

1. Nop ni dahni a i ki-uap ciangin i lasak theih kibang lo ahih manin, gualnuam takin la sakkhop diamdiam cih bang piang thei lo ding hi.
2. Pawlpi bangzah hiam in a biakna Labu uh a kizomin khen

a, Labu i khet ciang zong a tul sawmsawm in kikhen thei ding a, a man tawm tuam ding hi.

3. Minam dangte in Tedim pau a zang Zomite kipumkhatna hong muin i la hong sakpih ding uh hi.
4. Zomite teenna khua tuamtuam (Tedim, Champhai, Lamka, Kuala Lumpur, Tokyo, Texas, Melbourne, London, Singapore etc.) ah khual i zin ciangin amau la theih leh ei la theih kibang ding a, tua in kikhohkhopna nuamsak tuam ding hi.
5. Pawlpi dang pan hong kikhawm i mote leh i zin le lengte in i biakna la hong sakpih thei pahpah ding hi. I tate in a pute biakinn ah a kikhop ciang zong, a la uh sakpih thei pahpah ding uh hi.
6. Pawlpi tuamtuamte hong kinaisak tektek ding hi.
7. Sanggam khat pumkhat suakin la kibang i sakkhop pen Topa muhna ah zong kilawm ding a, Pasion in thupha hong pia ding hi (Late 133:3).

I pankhawm diamdiam ciangin kikhawsuak hi. (*United We Stand*)

den zo lo ding a, mi tawmcik ading Labu tawmcik kikhen pen a labu man tam pah ding hi.

3. Minam dangte in i kithutuak loh zia muin, amau' biakna la a sakpih dingin hong zawn ding uh a, i mite in zui lai ding uh hi.
4. Kawlgam pualama Tedim pau a zangte in amau zat ding Labu kibawltawm tek ding uh a, khualzin ciangin Kawlgam sung a Tedim pau a zangte tawh la kisakhawm thei nawn lo ding hi.
5. Pawlpi dang pan hong kikhawm i mote leh I zinte in i biakna la sin tawm thapai se ding uh a, i tute in a pute biakinn ah a kikhop uh ciangin a la uh sakpih thei lo ding uh hi.
6. Pawlpi tuamtuamte kilangneihna, kituambawl na khangsak semsem ding hi.
7. Sanggam khat takpi, la kibang nangawn sakhawm thei lo a, tangpeek tek i hihna mite in hong thei ding a, zumhuai lua mahmah ding hi.

I tangpeek tek ciangin kikhawsuak zo lo hi. (*Divided We Fall*)



MINAM BUP LAI TAWH KISAI DOTNA

- Rev. Suan Khan Thang

Zeisu sunga sanggam itte aw,

Tulaiin biakna Pawlpi (denominations) tuamtuamah a om Tedim pua a zangte in biakna La, a thu kibang neihkhop ding, leh Tedim Lai Siangtho bu sunga minte (proper names) a kibang neihkhop ding deihna lianpi om hi. Hih bang lunggulhna pen a khangto minamte lunggulh leh a neih uh hi a, lungdamhuai mahmah hi.

Hih thu tawh kisaiin dotna ka bawlte lungsim takpi tawh na hong dawn nading uh Jesuh Khrih min tawh ka hong thuum hi.

Mimal leh **Pawlpi tuamtuam** hih lamah alunglutte banah, hih anuaia sung panin a tawmpenin khat ta beek in na hong dawnna uh August 15, 2010 main na hong khak ding uh ka hong thuum hi. Tuate : **Pawlpi** : ZBC, EBC (Myanmar), ZBCM, AG, KZBC, TBC, SDA, CBA, CBC, RC, UPC, Presbyterian etc. etc. **Editor** : Lungdamna Aw, ZOMKA, Lungvakna, Tongsan, Momno, Zangkong Awging, Zolai Zunna. **ZCF** : Malaysia, Hong Kong, Singapore, USA, UK, Japan, Sweden, Germany, Australia, Norway, Thailand etc. **Zomi Innkuan** : Gam tuamtuama makaite, **Sangsiate** : Theological College / Seminary, College, School etc.

Dawnnate khak nading :

Email : suankt@gmail.com

Telephone : 91-9615558559

Mail (Post) : Rev. Suan Khan Thang

ZBC Office, Bethel Veng

Champhai, Mizoram – 796 321, INDIA

Hih anuaia dotnate na deih dan tawh kizuiin nambat pia in. Na deih pen No. 1, Na deih melloh No. 2. Na deih hetloh pen nambat 3. Deih tuam na neih kei leh No. 0. Na min, na nasep min & na address hong gelh in :

I. LAI SIANGTHO :

Tedim Lai Siangtho bu sunga minte (proper names) tawh kisai bek hong kidong a, translation lam kidong lo hi. Minamdangte in zong version tuamtuam nei uh a, ahi zongin a Bible sunga Proper Nameste kibangsak hi.

1. Hilhcianna Kithuah Tedim Lai Siangtho (2007 Edition) sunga minte : Gtn. Jesu, Khris, Judah, Izipt, Mari, Josef, Jeim etc. _____
2. Tedim Lai Siangtho (Puahphatna, 2004 Edition) sunga minte : Gtn. Jesuh Khrih, Jew, Egypt, Mary, Josef, James etc. _____
3. Tedim Lai Siangtho (Kam Hau Dialect) sunga minte : Gnt. Zeisu Khazih, Zudah, Izip, Mazih, Zawtah, Zakoh etc. _____
4. Pawlpi tuamtuam sung panin a tamzawte deihna ka koppih hi _____

II. TEDIM LABU :

1. Tedim Labu sung a late a suak masapen ka deih hi. _____
2. Tedim Labu sung a late a kipuahpha pen ka deih hi. _____
3. Pawlpi tuamtuam sung a makai a tamzawte deihna ka deihpih hi. _____
4. Zomite phuak late a theology amaan leh Labu sungah hel dingin hoih ka sa hi. _____

III. LABU MIN DING :

1. **Tedim Labu** mah hoih ka sa hi. _____
2. **Tedim Khristian Labu** kici leh ka deih hi. _____
3. **Zomi Khristian Labu** kici leh ka deih hi. _____
4. Pawlpi tuamtuam makai tamzawte deihna ka deihpih hi. _____

IV. Tedim Labu leh Tedim Lai Siangtho vai Pawlpi tuamtuam panin makai 3 tek beek paikhawmin Cope Centennial Jubilee Celebration pawl khit ciangin Tedim khuaah CCJ Committee or ZCLS or innteezna tawh (a thukim uh leh) **Consultation** neih ding hoih ka sa hi. _____

Jesu Khris sung ah na sanggam,

Dated Champhai
May 20, 2010

Rev. Suan Khan Thang
Editor, Laitai

PIANSAK BANG A NUNTAKNA

- Pa Suan Khan Tuang, Vapar

1. Zomite pianna bulpi in thupha ngah numei ahi hi.
2. Noah hun main mihing nam khat om a, ganhing nam tampi om hi. Tua ganhingte in Pasion in a bawl bang tekun ham uh hi.
3. Ganhingte in Nipikal khat sung a ni 7 sung hamdan kibang khatin ham uh hi.
4. Tua ganhingte in Pasion a phat uh ciangin ganhing dangte' ham zui loin, amau hamdan tekun ham uh hi.
5. Nang Zomi ahi dingin Pasion in hong bawl na hih leh, Zomi na hihna panin na peng (escape) thei kei hi.
6. Pau tuamtuam thei-in na pau ta zongin Zomi na hihna a bei tuan kei hi.
7. Zo ngeina teng thei pongin, Ton le lam, gawh le lup, latung laphei, na theih hangin Pasion in hong piak na pau tawh Pasion na phat kei leh, Pasion in hong bawl dan lopiin Pasion a phat na hi hi.

LUNGDM KOHNA

Pa Go Lian, Ngur khua in Laitai huhna Rs. 300/- hong piak kilungdam mahmah a, Hih banga minam leh Lai a itte Pasion in thupha azah tampi na pia ta hen. - *Editor*

SIANGTHO KITEENNA

1. May 7, 2010 in Vapar ZBC Biakinn ah Tg. Cin Suan Thang leh Lia Cing Lian Mawite nupa pumkhat suahna nei uh hi.
2. April 27, 2010 in Sesih ZBC Biakinn ah Tg.Lam Khan Mung leh Lia Man Sawh Lunte nupa pumkhat suahna nei uh hi.

Hih kiteeng thakte kilungdampih mahmah a, Khristian innkuan hoih tak asuak dingin Pasion in thupha pia ta hen.

- *Editor*

TULAI THUPIANGTE

1. Aizawl ZBC sunga **Nupite** (BWS) in Sialkal Khawk sunga ZBC omna, Mimbung, Teikhang leh Hiangmun khuate van dingin May, 27, 2010 in dingkhia uh cih thu kiza hi.
2. Murlen ZBC Upa Khai Za Dal tapa **Tg. Lian Muan Kham** in Union Biblical Seminary, Pune ah M. Th. (NT) sin ding Murlen nusia ta hi. A Lai Siangtho sinna pen India gama Evangelical Christiante sanginn khat hi a, Rev. Dr. J.M Paupu leh Rev. Suan Khan Thangte in hih sanginn pan B.D. zo uh hi.
3. **Upa Kham Suan Pau**, Medical Physicist Aizawl, pen Mizoram kumpi in a nasepna (Cancer kepna) lamah dinmun sangpi Radiological Safety Officer (RSO) ah lamto hi, cih kiza hi.
4. Champhai khua **Upa Z. K Thang** leh Zokhawthar khua a **Upa Z. K Dongte** in amau inn mun panin Tedim Lai Siangho zuak dingte hong saisak manin a Pasion nasepna uh pahtakhuai kisa hi. - *Ed.*
5. USA gama **Episcopal Pawlpi** laka pawlkhatin neih kibang (pasal & pasal) kitenna sang mawk uh hi.
6. **Lia Go Za Cing**, Malaysia a om in anasepnasa Pawlpite hong phawkin a sawma khat sumpi hong khak valval a, thupi mahmah hi.
7. Sesih English Medium School a Principal dingin **Rev. Zam Suan Pau Suantak** M.A., B. Th., 10(Hindi) in June kha panin a nasep kipan ding hi. Ama hong pai nadingin Hih anuaiate in Rs. 1000/- tekin huh uh hi :
 1. Upa Gin Za Go, Azl
 2. Upa Z. K Thang, Cpi
 3. Pa Nang Sian Mung, Azl
 4. Upa Kham Suan Pau, Azl
 5. Rev. Suan Khan Thang, Cpi
8. Imphal CBA Upa Suan Do tapa **Tg. Thangbawi Hatlang** in Orthodox Theological Seminary (Serampore Senate) Kottayan, Kerela panin M. Th (NT) zo cih thu kiza.
9. Lanva CBA Pawlpi sunga Upa Nok Suan Lian tate nih in NET laivuanna zoin, Research kipan thei ding cih thu kiza hi.
10. CBA ah President a len ngei Upa Neng Khaw Pau (L) tapa **Tg. Gin Khaw En**, New Lamka in Eastern Theological College, Jorhat panin B.D. zo cih thu kiza hi.

11. Manipur gam sung buaina hangin Petrol leh Diesel leh kispap tuamtuamte Mizoram tawnin Guite Road lamah kipua lut hi.

12. **Scholarship** : Mizoram Board nuaia Cl. X (tan sawm) zo leh aung siahte adingin anuaia Scholarshipte 31th July 2010 ciang dongah ngetna khiat theih hi :

1. Post Matric Scholarship
2. Post Matric Merit Scholarship
3. Post Matric Minority Scholarship
4. NEC Stipen 86 Book Grant
5. Junior / Senior Research Fellowship
6. Rai Foundation Professional Scholarship

A kician zawa thei nuamte adingin Tg. K. Joseph Hatzaw (9862754259/0389-2349068) kiangah zingsang (5-7A.M) leh zan (7-10P.M) hun sungin kan theih ding hi.

13. Tunai a **HSLC & HSSLC Result** suak a ZBC Pawlpi pan lawhcinna a ngahte :

HSLC :

1. John Suan Lian *s/o Upa Vum Khan Do, C-long* I Div.
2. Benjamin Thang Min Lian *s/o Rev. Gin Lam Thang, C-long* II Div.
3. Kap Khan Muan Shoute *s/o Sub.En Ngaih Mung, C-long* II Div.
4. Lang Suan Pau *s/o Upa Gin Khan Mang, C-long* III Div.
5. Tg. Thang Khan Mang *s/o Pa Cin Do Pau, Vkt* III Div.

HSSLC :

(C-long -Shillong, Azl - Aizawl,
Cpi - Champhai, Vkt - Vaikhawtlang)

Science :

1. Tg. Nang Suan Piang *s/o Pa Kham Do Pau, Azl* I Div.
2. Esther Vung San Nuam *d/o Sia Dam Za Go (L) Cpi* II Div.
3. Samuel Thang Khan Muan *s/o Upa G K Mang, C-long* II Div.

Commerce :

1. Michael Thang Go Lun *s/o Pa Pau Cin Kham, C-long* III Div.

Arts :

1. Kap Thang *s/o Nu Man Khan Niang, C-long* II Div.
2. Lynda Don Khan Cing *d/o Nu Gin Ngaih Ciin, C-long* II Div
3. Zam Muan Tuang *s/o Rev. Hen Khan Go, C-long* II Div
4. Mary Kim Thian Mawi *d/o Upa Gin Khaw Zam, C-long* II Div
5. Tg. Kam Luah Thang *s/o Upa B.Mang, Cpi* III Div.
6. Lia Vannunmawi *d/o Pa Tawk Piang, Cpi* III Div.

Lawhcinna ngah thakte kilungdampih mahmah a, mai lamah zong lawhcinna a neito zel dingin kideihsak hi. - *Editor*

14. **Tg. Khen Kap**, Leisenzo in zong IGNOU panin B.A. zo thak cih thu kiza hi. Lawhcinna ngah thakte kilungdampih mahmah hi.
15. Champhai ZBC Upa Zam Za Lang tanu **Lia Man Lian Niang** in tunai in B.A.(Hindi) zo cih thu kiza, kilungdampih mahmah hi.
16. **Thang John**, Sesih in B.A (Hindi) zo cih thu kiza hi. Amah pen Sesih English Medium Sang ah Sangsia asem ahi hi.
17. Champhai Vengthar ZBC Upa ahi J.K Lianpi in '**Hun Nunung Gospel**' cih zangin Audio Casette, Lamka khua ah a khumsan laitak hi a, a sawt loin kingah thei ding hi cih thu kiza hi.
18. **Leitungbup Zomi Innkuan 2010 - 2012** makai thakte :

President	:	Dr. Chin Do Kham, Salt Lake City, UT, USA
Vice President 1	:	Pa Hang Khan Lian, Singapore
Vice President 2	:	John Thang Sian Mung, London, UK
Gen. Secy.	:	Pa Go Sawm Khup, Tulsa, OK, USA
Asst.Gen. Secy. 1	:	Pa Do Khan Khup, Elmhurst, NY, USA
Asst.Gen. Secy. 2	:	Anthony Gin Khan Lian, Frankfurt, Germany
Treasurer	:	Pa Pau Khan Khup, Singapore
Asst. Treasurer 1	:	Pa Vung Lian Mang, Tulsa, OK, USA
Asst. Treasurer 2	:	Pa Khen Za Muan Thang, Esbjerg, Denmark

Members :

 1. Dr.H. Chin Khen Mang, Tulsa, OK, USA
 2. Pa Kipp Kho Lian, Hamburg, Germany
 3. Pa Gin Mang, Calgary, Alberta, Canada
 4. Rev. Zam King Mang, Portland, OR, USA
 5. Pa Disciple Kap Sian, Kuala Lumpur, Malaysia
 6. Dr. Cing Pum Neam, Philippines / Tedim, Myanmar
19. October 2010 ciangin **Shillong ZBC** in a kiphuhkhiat zawh uh kum 10 a cinna lungdam kohna pawī zat sawm uh cih thu kiza.
20. May 22, 2010 in Roman Catholic Pawlpi Kalay Zone leh Tedim Zone kigawmin "**Kalay Diocese**" kiphuan a, tuaah Tulpi (Bishop) nasem dingin Msgr Felix Lian Khen Thang kikoih cih thu kiza.
21. Aizawl khua ZBC Naupang Nipisang Superintendent a sem **Pa Nang Sian Mung** in Laptop Computer khat lei hi cih thu kiza.
22. Southern Manipur (Churachandpur District) sung a **gospel lut zawh kum 100 cinna** lungdam kohna pawī Lamka khua ah May 4-7 sung kinei cih thu kiza.

23. Nu Khup Ngaih Cing, Vengthar in May 10, 2010 in amau teena inn panin hong nusia hi. Amah pen Vengthar BYF Makai, Tg. Pau Sian Thang nu ahi hi.
24. Pa Khan Go, Vapar khua in May 7, 2010 niin Lamka panin hong nusia hi. A luang Vapar ah kipua in, May 9, 2010 in Vapar hanmual ah kivui hi.
25. **Tedim Labu leh Lai Siangtho** bu sunga minte tawh kisaia dotnate gam tuamtuama Zomite lunglut mahmahin Internet tungtawnin a dawwna pilhuai pipi hong khakkhak ta uh hi.
26. **Zokhawthar ZBC Pawlpi** in May 17 - 25, sungin ZBC gam khua pawlkhat vanna nei uh hi.
27. New Lamka Go Cin Khup Veng a teng **Tg. H. Kham Khan Suan** in Banaras Hindu University, Varanasi ah Professor a sep kawmin Ph.D. sin a, tu in a thesis defend zo ta hi cih thu kiza hi. ZN
28. Vung Lian Mang, 4232 E 84th St., Tulsa, OK 74137, Cell : 918-906-9274, Home: 918-949-6157 tungtawnin gamdang panin Kawlgam sungah a manlangin sum khak theih ahih thu kiza. ZN.
29. ZBC Pawlpi omna khuua Laitai kikhakkhia zah hih anuaia bang hi : Vapar - 120, Champhai 77, Sesih 58, Aizawl - 38, Murlen 33, Hnahlan - 32, Ngur Vengsang - 30, Shillong & Vengthar - 29 tuak, Teikhang - 28, Hiangmun - 27, Vaikhawtlang - 25, Zokhawthar - 19. Mimbung 17, Leisenzo - 16, Ngaizawl & Ngur - 15 tuak, New Champhai - 12, Thuampui - 9

THUZAKSAKNA

Senate of Serampore hiam Asian Theological Association tawh a kizom Bible College panin B. Th., or M. Div., B.D., a zosa, Pastor nasep ding a lunglutte in ZBC Pawlpi sungah a sepnop leh Laitai Editor kiangah a thu dot theih hi. Leitung laipilna ah 10+2 hi thei beek leh deihhuai hi. - *Editor*

THEIHSIAM DING NGETNA

Champhai ah tulaiin Electric a ginat loh banah laikhetna setpi a neite in sep ding hau thei lua uh ahih manin Laitai June & July issue khatah hong kihawmkhawm pak hi. - *Editor*.